

11. Quinque elementorum etiam qualitates præstantia augebantur; sub novo illo terræ domino omnia nova quasi erant.

12. Sicut luna oblectando, sicut sol ardendo, sic ille rex cives conciliando nominis sui significationem comprobavit.

13. Quamquam oblongi ejus oculi usque ad aures porrigebantur, præcipua tamen videndi facultate præditus erat per libros, qui vel minimas res gerendas indicant.

14. Tum venit ad eum, qui imperio accepto confirmato firmus stetit, alteræ dignitati regiæ similis autumnus, lotis ornatus.

15. Intolerandus RAGHUIS solisque æstus, cujus via relicta erat a nubibus, pluvia effusa levibus, eodem tempore plagas permeavit.

16. INDRAS reposuit arcum pluvium, RAGHUS arcum victorem arripuit: uterque enim, ad hominum res peragendas, vicissim arcus suos intenderunt.

17. Anni tempestas, lotum pro umbella sumens, atque florentia gramina pro flabellis, illum æmulabatur, non vero ejus pulchritudinem attigit.

18. Eo tempore omnium hominum, oculis præditorum, amor æque fervidus erat in illum, cujus vultus benevolentia nitebat, atque in lunam, clare fulgentem.

19. Gloriæ illius evolutiones dispersæ quasi erant per anserum catervas, per stellas, atque per lacus lotis abundantes.

20. Mulieres, fruges custodientes, considentes in sacchariferæ arundinis umbra, canebant servatoris illius laudem, e virtutibus ejus ortam, cujus enar rationem inde ab ejus pueritia incipiebant.

21. Serenum evasit mare post ortum AGASTYÆ fortissimi, e testa nati: post RAGHUIS ortum, cladem timens, contremuit hostium animus.

22. Tauri gibberi, furore acti, fluviorum ripas suffodientes, imitabantur robur ejus lepide ludens.

23. Ejus elephantī, odorantes *saptaparnarum* flores, elephantorum liquoris odorem spargentes, quasi invidia moti septemplicem liquorem exsudabant.

24. Autumnus, fluvios pervios faciens, viarumque lutum exsiccans, ad expeditionem eum incitavit, antequam vires ejus paratæ essent.